

東川劉文簡公集

東川劉文簡公集卷之十七

誌銘

贈承直郎工部主事李君墓誌銘

浙有君子曰李君諱曠字尚廣者居縉雲之麻車園
山塢環植脩竹因號曰竹軒課童僕以耕漁爲業足
跡不入城市嘗賦村莊八詠超然有物外之趣其所
得於中者殊非與俗倫也正德丙寅耳後忽患疽時
子寅舉進士官工部都水司主事恐傳聞貽憂乃慰
以書曰吾疾日就勿藥汝始居官但委身圖報以謹
厚存心以儉潔勵行毋墜先世清白之風吾願足矣

工部奉書即移疾䟽歸無何訃至蓋是歲九月二十八日屬纊也享年六十維時鄉之士大夫失所矜式而里鄰之困乏者無所仰以舉火於是吊哭者無虛日亦可槩見其卓行之孚於人矣越四年會

詔覃恩贈君如工部官人又嘖嘖稱嘆謂君其德名爲幾者乎君之先世家台州仙居之李村五世祖古濬宋季以縉雲美化書院山長樂其溪山之勝家焉今爲縉雲人大父諱秉憲贈刑部右侍郎父諱榮以義受承事郎母呂氏出邑名族君幼穎敏不群稍長受業於三衢吳秋官天祐補邑庠弟子貢遂錡然蜚

聲場屋間然累舉不偶識者曰如某弗利豈信有命乎弘治乙卯始應貢禮部當入太學屬工部以壬子舉於鄉隨侍京師乃語之曰吾受教家庭竟未獲遂所志以荅

君父之恩今年將至安能役役仕塗乎汝當勉繼吾志遂浩然南歸構所謂竹軒者以居而託其業於子矣君篤孝友方家食承事公患手足不仁卧枕席者三年君就養左右撫摩疾痛徹夜達旦湯藥必嘗後進人以爲難已而不起居喪殯葬一如禮有第四皆幼乃加禮延師教之期各成立旣長則咸擇娶名族

與人交誠直坦易恒以寧人負我無我負人爲心及
治已畧不少恕教子姓諄諄以忠孝和友爲本每見
從賢師友游則喜見顏色未嘗以財利累其心常自
誦曰有好子孫方是福無多田地不須憂成化丙午
歲大侵麗水人有率衆告急者即竭困倉糶之後悉
負乃焚券棄責配陶氏同邑福州中衛經歷女事舅
姑與君合德子男二長即工部今爲郎中以脩潔著
聲績盖大受者次賓女一適鄭儒士早寡孫男三民
瞻民牧民德曾孫男一學書孫女五曾孫女二歲戊
辰九月二十六日塋邑蒼山之原尚未銘於幽石至

是工部奉狀見屬曰非敢緩也異有以信於後也余
雅重工部名行今復悉君之教於家者如此竊嘆世
恒以顯晦論人顧有名位非不烜赫也而中無所得
其散爲甚如君雖韜晦而行足以爲世範使得遇於
時而本其所以建立當何如而又有如工部之賢
益知自古賢人君子非但出於世家固有世德也銘
曰 貴也者孰不知其可慕德也者孰不知其可據
與其不可得於人曷獨不可得於身於戲蒼山之陽
卜惟其藏慶衍厥後愈遠彌光

明故思州府知府張公墓誌銘

公諱介字庶夫姓張氏成都之內江人其上世以隱德著稱祖諱懽明習陰陽家始從邑大夫辟授陰陽訓術父諱彥理以公貴贈戶部主事克世其業母甘氏封太安人公生而敦朴穎悟初戶部卒年未三十公尚在襁褓稍長出就外傳即能專一讀書不與群兒事追逐旣受業於叔父教授君日見進益名聲藹鬱隣邑士多執經就質問至天順己卯遂舉於鄉成化丙戌第進士尋以疾乞告父之起拜戶部福建司主事轉湖廣司員外郎擢知貴州思州府秩滿乞休凡在林下幾二十年今上覃恩進階一級可謂蹈

榮名而享終吉者矣公篤於孝友奉太安人極其色
養念兄燮早世弟粹孱弱撫教諸從子如已出後俱
成立其在家食授徒所得束脩於人盡歸諸母凡弟
及妹婚嫁之資悉極力營辦以是太安人雖稱未亡
人心獨安焉比在告妹歸竈家以婿逋負鹽課偕匿
他所公恐貽太安人憂親出訪尋以歸竭所有爲償
其課俾與太安人居已而復昏嫁其子女其篤同氣
之恩有如此居官刻厲勤慎在戶部隨所任事一一
辦治至思州尤多惠政其於士類每當朔望或政暇
則詣明倫堂親課其業其穎異者又遣從隣邑名士

游自是士爭矜奮而思州之士始連獲舉以科目顯
迄今頌之比致仕日與宦而歸者爲真率德星會其
出處有如此嗚呼是非篤行君子耶正德己巳二月
二十五日卒於正寢享年八十一配陰氏出同邑名
族 封安人先公九年卒賢而克助於內生子男四
人作表作襄作袞作辰女二人皆適宦族孫男十一
人叔安叔宣叔寶叔冠叔宜叔寔叔宗叔宥叔字叔
宙叔宁孫女六人曾孫男二作襄舉鄉進士始仕襄
陽知縣能舉職叔安舉進士初任蠡縣知縣今擢山
西道監察御史方嚮用公卒之明年襄陽欲從其兄

奉柩於龍臺山先兆側啓安人之窆合塋屬余銘于
幽石余與襄陽交厚因知御史於公固仰德舊矣乃
爲之詞曰 士以名顯孰獲其全本末倒置其飾靡
愆有美如公內外完潔持心近厚焯有聲烈天固私
之旣多孫子觀厥世美以享壽祉龍臺之陽是曰幽
宮過者式焉尚仰其風

明故封文林郎大理寺左寺副劉公墓誌銘
封大理寺左寺副劉公正德己巳冬十月二十九日
卒於家時其子潮以四川按察司僉事擢布政司左
叅議適履任而訃至遂戴星歸將治塋事屬余銘於

幽石余方讀禮家居荼毒未能也顧叅議君之執憲
明斷仁恕利澤下流觀其子可得其父矣誼不容辭
按狀公諱威字偉望其先出漢長沙定王發之後有
曰禮者分封安成子孫因家焉今爲安福人在宋有
諱德言者仕至水部員外郎江南發運使生子程秩
稅咸歷顯要時號叢桂劉氏稅之後十四世諱子遠
者洪武初以明經薦於朝將任用固辭歸教授鄉
邑是爲公之曾祖祖諱鶩駿父諱毓秀皆隱德不仕
母李氏止生公一人公自少穎敏旣長儀觀魁傑能
通經史大義而尤善行書人咸器之以蚤失怙瑣瑣

子立未究其志父喪不克塋者凡幾年其哀慕悲號
無一日忘父之始獲卜佳兆塋如禮人皆稱公之孝
天性友愛篤於恩誼再從兄偉弁貧無所資公每周
給之其孫沛與族孫莊復不能存公收之以時昏娶
所以卵翼之者不異已子其鄉隣之乏絕則恒待以
舉火而其拯窮濟急初不自恤其匱也有孀婦者死
無歸公亟買棺塋之或曰貧者夥矣曷能盡然公曰
吾自見之不能忍爾與人交誠信不欺閭里有訟者
得公片言即屈服蓋有不以干有司之法爲辱而耻
不直於公者公嚴教子叅議君方家食嘗語之曰吾

家自水部至今雖世不乏聞人而仕不遂然人多茹
德者謂後當顯顯必在汝慎自勗勵繼君舉進士官
大理恒書古人著績平反者訓之勉圖報稱已而被
勅封文林郎署左寺副人謂公之食報非無自也配
王氏出邑冷溪名族慈柔淑惠克相於公生子男四
人長即叅議君次瀾早卒次浣育德邑膠次泗女二
人皆適名族先卒孫男四人曰泉曰永餘歿孫女五
人公之脩於家而延於後者如是是宜銘其得年六
十有六其兆在某里某山之陽先是公命次子浣視
其兄於蜀且欲具歲制叅議君不能違泣而從之以

附於浣已而浣至家明日而屬纊若有所待然亦非偶也銘曰 長沙之源慶澤混混宛彼叢桂厥派益遠乃延於公亦旣濬之於赫封秩自

天命之孰啓其源弗洪其流濯濯文江以永垂休

明故贈淑人林氏墓誌銘

余同年友工部侍郎李公時升以病䟽乞歸調攝上篤念賢勞許之仍命馳驛以行俟勿藥有司䟽聞起用盖異數也公當就道乃以其配淑人之亡將卜塋諉余銘其幽石且曰死生常理吾非不能遣也而吾妻之賢誠有內助焉而不可使之泯於後也按

狀淑人姓林諱瑠父諱華母周氏世爲鄞之望族淑人生而聰慧莊懿爲父母所鍾愛成化丁未公配楊氏沒乃委禽焉遂歸公爲繼室即以孝愛和順稱於九族舅贈侍郎公姑沈淑人俱患風疾艱步履淑人事之恒侍左右不少違凡湯藥飲膳滌濯之類必親視之未嘗或委於人舅姑旣沒公兄怡稼居士主家政淑人事之如舅無違禮其處姑姪御僮僕皆有恩愛內外諧睦無間言其宜於家者如此其識見則公始筮仕工部主事即監稅蕪湖欲挈以行淑人曰蕪湖密邇家鄉恐親族萃至不有玷君之名節乎遂不

赴歸鄞公以郎中適論營建功同事者咸晉秩矣公
再辭不允相知者多沮之淑人獨從吏復上疏竟獲
辭公丞應天屬歲連大侵貧民每聚衆劫掠殺奪無
所忌有溧陽民爲建平所害彼此殺傷勢甚惡守備
者議欲動兵擒之檄公撫捕公憂形於色淑人曰某
卑官也以任事賈禍處之怡然君當塗處事乃戚戚
如此耶第盡心以求其情度勢以消其變足矣按狀
如此其信有助於內者耶古所謂動合禮儀言成規
矩者淑人其庶幾矣是宜爲之銘淑人生成化辛卯
八月初一日卒於正德庚午八月七日享年四十始

從公貴 封孺人再封宜人今贈淑人生男二長維
孝補郡博士第子負次維學女二長文貞許聘於董
御史之子聰次庶出尚幼其塋在邑之清道鄉祖塋
右寔 年 月 日也銘曰 古稱婦德如
彼殷雷相厥夫子於義不回婉婉柔順壺之則孰
不爲婦其儀靡忒彼美淑人式克兼之於戲命也而
曷止於斯

明故耕樂居士朱君墓誌銘

耕樂居士者吾蜀瀘之隱士也諱啓明字光正其先
四世祖諱智聰元季避兵韜迹沙門入

國朝始歸姓朱卜居瀘宜民鄉方山北今遂爲瀘州
人智聰生五子中罹家難皆散亡惟諱景純者存於
君爲祖生四子諱麟者於君爲父性倜儻年十三始
讀書即能了大義後常以才智擢任州司克辦治鄉
人迄今德之生三子君其仲也少聰悟補州博士第
子貧累舉不偶乃浩然曰豈榮進信有素定耶爰退
耕方山之陰不復事進取寒暑手古史一卷不釋暇
則曳杖往來隴畝或嘯咏忘返因顏其軒曰耕樂而
遂以自號云君事父母傾意承順務得其懽心每遭
微疾必躬執湯藥之事甚則稽顙北辰求以身代疾

止復故處兄弟惇友愛未嘗少色忤或見侵第懷德
報他不恤每訓戒子孫曰慎毋以小利傷骨肉之愛
難得易求可書紳也族屬貧不能給繇則以義率富
者分代之與人交重然諾患難必相恤鄉隣有訟者
咸願往質而不之官曰是鄉之彥方也正德戊辰十
二月二十八日卒于家享年六十有六配劉氏出郡
名族與君合德有子男六人璨璋珪玠璣舉弘
治乙丑進士授南京戶部主事轉貢外郎有文行璣
郡庠生女六人二適士族餘俱殤孫男十人子忱郡
庠生子厚子謙子讓子恒子恂子達子節子慎子敏

孫女十三人曾孫男二女一君卒之明年戶部奉狀
請銘欲於是冬十二月十八日奉柩塋于鳳翅山祖
塋之左乃爲之詞曰 豐其內嗇其外困於身昌於
其後之人

明故舒處士墓誌銘

處士姓舒諱寅字式甫自上世家饒州之樂平代有
聞人至曾祖諱彥祥尤以行誼著於鄉里宣德間邑
苦水患處士䟽請築堤捍禦 制可仍遣行人督視
遂旌爲義民祖諱用剛父諱九臯皆克世其家母
氏處士生而純恪端慎少長受業於邑令世父韶及

叔父陞通經史大有所造諸人咸以名科待之乃累
不偶於有司繼父病瀕危殆盡邑中莫有明醫究其
病者因嘆曰爲人子者信乎不可不知醫也即移其
所志於醫術久之其業大精有求療者輒往診視初
不以貴賤貧富異其心欲責報也人因名之曰儒醫
家素饒裕有告匱者不問踈戚濟之惟恐不及亦不
虞其後能償與否也性朴茂篤於孝友家居處昆弟
宗姻以及朋友一無矯飾與人交重然諾每疾世之
競浮靡而不務惇實者思以移俗軌物故克已勵行
皆歸於誠因自號曰誠齋人亦信之謂不虛也正德

辛未六月十一日以疾卒距其生正統己未享年七十有三配 氏賢而合德生子男五長曰記次曰詔以明經舉於鄉次曰讓曰諄曰誠補邑庠弟子貢女一歸士族處士卒詔方卒業京邸將究其遠且大者而訃忽至哀慟無已欲以 年 月 日從其兄記塋於 之原乃奉其鄉人刑部員外郎程所爲狀請余請曰詔不孝吾父病不及視湯藥沒不及視歛含即死無可贖矣惟是懿行之見重於鄉評者不可使泯焉無聞敢用以請以干銘於幽石庶少逭不孝之罪耳余重違其情乃爲之詞曰

周于利而不私其親周于德而不顯其身惟其不顯以遺其後之人

明贈戶部主事舒君封太安人高氏合塋墓

誌銘

贈戶部主事舒君諱道興字子讓卒於弘治壬子五月日即卜塋於其邑之明月里未有誌也越二十有一年是爲正德癸酉而其配封太安人高氏亦以是月初九日卒其子表時仕戶部主事訃聞乃解官歸將啓其父之窆而合塋焉問銘於余按狀君之始祖諱普榮初家叙州之富順以隱德稱祖志高

始自富順遷成都之資縣又遷銅梁之明月里今遂
爲銅梁人父諱全母周氏君四歲即失怙鞠育於母
氏幼有至性篤實不妄言笑於經書咸知大義以獨
與母居迫於生計不克成其業然能勤務耕穫而亦
以此慇懃親隣故在一鄉人咸敬之而樂親焉平居
於微事必遵禮度有以氣勢相競者不解吐軟熟語
爲容悅但以直詞法語喻解之人多感悟而息太安
人亦能合德性慈惠寡言工紡織凡君之幹蠱於家
資用不乏者太安人助於內爲多君於人之稱貸者
度終不能償悉焚其券顧語子輩曰吾將遺汝於後

也雖儉於治家而教子每延名士加禮踰於流輩故
人所以誨之者亦能副其意君旣卒太安人教於內
者亦不替故表竟以弘治辛酉領鄉薦越乙丑第進
士爲戶部主事君雖不逮祿養而獲蒙

贈典至太安人猶親被勅封幽明光賁推其所自

君之所以積慶流芳者豈偶然耶距君之生享年五
十有九而太安人加十有八年男三長韜先卒次簡
次即主事也女一孫男六 葵芹蒞蘭孫女四銘

曰 地有鹹泉厥井明月厥利在人里名斯揭孰
居其間弗顯而耀懷德維人爰食其報於赫名科

起於時 皇有令典 龍章賁馳亦既始之而復終焉合璧於斯世永無遷

明致仕重慶府知府沈公墓誌銘

吾重慶知府沈公莅任僅三年遂乞致事時年猶未至也越二十有八年春秋八十有五方康強如少壯故舊書䟽咸自手荅端楷嚴整可觀可誦其福履盖未艾者乃卜營壽藏於虞山西壽昌之麓以春舊郡中士也丐鄉進士姚奎屬豫銘於石於乎公固達生也而春即其手書如忽承顏於三十年前其體貌之豐厚言語之溫雅宛然有道者氣象曷能忍爲之顧

其履行之槩則有不得而辭者公諱海字觀瀾別號
葵軒世家蘇之常熟曾祖諱餘慶祖諱天祿父諱伯
通以公貴 贈承德郎刑部主事母朱氏

封太安人公以成化乙酉舉於鄉明年丙戌第進士
授刑部主事晉員外郎郎中擢知福建泉州府丁內
艱家居服闋未赴部復除重慶公賦性寬厚而莅事
簡重明敏其在刑部凡奏當之成出於公者人以為
不冤有獄囚旣能者淫一婦而妬其黨與競手搥殺
之遂脅見者為斫其首棄他所事敗露有司不加審
罪坐斫首者不服公閱檢勘狀有首頸無血之文疑

爲死後所斫再鞠而得其情乃改從毀屍律而以其
罪坐能人以爲法家不易及奉

璽書按事福建藩臬諸公重其得體比還大司寇以
雲南司莅京邑繁劇少得其人疏調公其在泉州慈
惠威斷吏民畏而愛之郡有永寧倉歲多逋負公稽
籍校其數無虧者競以倉出硃鈔爲驗公疑或有僞
者乃發其奸果得僞造倉印二十三顆蓋印久文滅
僞造私鬻日寢多遂咸抵法奏請給印其弊遂絕歲
旱公自責祈禱有願損十年壽化爲三日霖之言兩
隨足臬士經學無傳公聘興化進士黃乾亨舉人林

沂與諸生講解詩書經士多賴成就科第倍於前其在重慶治亦如泉州而法加密郡人至今有去後之思平居端重誠恪人不忍欺晚居林下惟以課子讀書爲事其於世法畧不及會

詔覃恩進階三品日與親知觴咏爲樂致仕大宗伯石城李公溫州太守古松陸公皆以丙戌同第進士者乃結爲三老會鄉人榮之性喜吟咏識者謂得唐人體今有葵軒小稿藏於家配朱氏封安人側室周氏子三人長韓育德邑庠次范次虞入胄監皆能世其業女四人適士族朱丙李輅楊耀程鋼其婿也

孫男四孫女三公之履行如此法國有銘乃爲之詞
曰於赫明公執事有恪不求其名厥聲孔焯位以
時升澤由位施所自得者秉心靡二退食於家維士
之式壽考繁祉天其永錫虞山之陽壽藏蔚焉誰其
息之百千萬年

明故處士陳君暨孺人田氏合塋墓誌銘

處士姓陳諱福天祐其字祖諱母氏世爲福建
之尤溪人至處士以兄諱寬者入侍

內廷友愛弗忍違遂挈家京師籍焉洎兄歷晉秩太
監視篆司禮監受知我憲宗

孝宗皇帝預開機密重務小心翼翼清譽日著君事
之待人約已加慎布袍草履人視之不知其出貴要
家也司禮公念君微服強以例授義官乃不獲已從
之人於是知處士之靜重而又因以知司禮公蓋秉
德率法不撓於公者平居孝友太夫人年老目昏處
士恒親執匙箸供飲食事諸兄雖閒居無廢禮尤好
賢敬士人樂與親接鄉人有卒京邸者處士旣爲之
殯而又諉人歸塋於鄉其嗜義類如此配田氏出同
邑名族與君合德所以敬順之者無少違生男一曰
貴女適張廣德孫男三曰士元士魁士冠孫女二處

士卒於弘治五年七月二十五日享年四十有二塋
宛平縣香山鄉之原越二十有二年而孺人卒享年
六十有四時三月二十五日也處士好讀書言行敦
朴無所矯飾而識悟尤不凡子貴雖尚少比屬續他
無所念惟執孺人手諄諄語不能出口大意欲孺人
教之讀書期底成立若自傍蹊曲徑雖通顯不瞑目
也自是貴稍長孺人遣就外傳夕歸則置檠於案躬
執女事坐於側督之或稍縱佚即泣語曰汝父病革
所不能訣者惟汝耳今若此我異日何以見於地下
耶貴感激業日進遂以正德丁卯舉於鄉人又知孺

人之賢不以孤子溺愛如此孺人卒踰月貴將啓處
士之窆合塋焉乃奉其友竇給事中所叙狀以余主
丁卯試事請曰先君之殯向以孤幼未有銘今復不
圖不孝之罪無可贖矣余讀其狀乃知世未嘗無遠
見之士若處士者視蠅營富貴沒即聲銷影沉何啻
逕庭哉遂不辭而爲之銘曰 世所貴兮吾不知其
可慕世所賤兮吾不知其可惡惟我所可爲坦焉其
如路乃昭焯於後人閱萬世以永固

封戶部主事萬君安人朱氏合塋墓誌銘

封承直郎戶部主事萬君卒其配安人朱氏先八年

卒塋於山之原至是其子戶部郎中斛乃奉柩啓安
人之窆而合塋焉奉狀屬余銘於壙石按狀君諱弼
字宗直魯菴其別號也先湖廣麻城人元季有元亮
者君高祖避兵於蜀大邑縣從徙崇慶今爲崇慶人
祖諱文斌父諱昱皆隱德弗耀母何氏君生而穎敏
明書經中成化乙酉鄉試會試禮部者再登乙榜制
於例授訓導江西之南城秩滿擢教諭湖廣之黔陽
又秩滿遂乞致仕君性介特所至但知務脩職雅不
隨俗以取媚在南城諄諄誨人士樂趨講下而亦多
所成就若南京吏部侍郎羅公玘浙江按察副使王

華知府廖汝器進士左悠皆及門者也在黔陽猶南城久益不懈其持心兢兢以禮法自守故甘於淡泊諸生或餽束脩者不受有以禮勸之者請但辭其貧不能致於義亦可君曰受於此而辭於彼其心寧安乎盍皆辭之兩無嫌也廣東聘校文鄉試即杜門不通賓客信宿啓行至鎖院戒不飲酒人問之曰校文所以取士而思欲得人非戒飲無以清吾心也其臨事之懼如此故所閱卷皆不失士黔陽乞歸諸相知者爭留之不能得曰壯而仕老而休吾心素所安也豈由於人耶居林下三十有三年歲時惟宴享故舊

以爲樂有司雖減以禮重之未嘗一言及官府事曰
是非不在其位者所與聞也安人亦出州名族與君
合德事舅姑得婦道姑何寢疾安人侍湯藥惟謹疾
革偕主事君焚香籲天求以身代比姑將屬纊乃言
曰願爾子爾婦皆如爾夫婦之事我也居家勤儉每
鷄初鳴輒興常語諸子婦曰夙興三日乃積一工之
餘宴安不可或縱也侍主事君南城將遣其子斛歸
育德郡膠請於君曰我不可以不偕往遂挈歸所以
教於內者日嚴久之獲舉於鄉至弘治壬戌舉進士
始喜謂主事君曰吾事君獲見兒子之成立吾事畢

矣君亦歸功於安人曰非汝無以有今日也即以是
年六月十三日卒享年七十有七主事君則卒於正
德庚午正月八日享年八十有三子三長即郎中次
石蚤世俱出安人次璣側室出也女一適知縣黃俊
孫男三梅槐桂孫女一曾孫男女四君尤篤友愛其
兄深以壽給冠帶輔本同舉天順己卯鄉試輔任穀
城教諭本鳳陽知縣至尋甸知府弟全亦以歲貢訓
導霍丘衣冠之盛非但甲於州邑而禮讓之美人多
頌焉固宜其後裔之昌也乃爲之銘曰

章以儒顯亞聖之門名科崛起璫著貞元亦有敬儒

鄉稱成孝君實繼之厥緒思紹文教勃興吏治聿張
踰三十載簪紱相望考德於君克啓其後刻詩以藏
辭質非謬

明故處士熊君墓誌銘

蜀有隱君子曰熊君世峻者酷嗜經史故恒手不釋
卷以誦讀之而究其旨趣雖醫卜陰陽之書亦皆涉
獵有質疑者輒告之無隱尤喜吟咏鄉之大家著姓
薰其德多遣子弟往從之游君不之拒而亦喜於訓
迪終日孳孳咄畢間無少厭怠以是人樂親之而出
其門者隨其資性各有所成就其登仕路以效用於

時者亦多矣君諱崧世峻其字先世家重慶之永川
後有諱子明者元季兵燹徙成都之資州資善鄉威
峯山家焉州尋改爲資陽人子明生均章均章生得
真得真生志翰是爲君之父有隱操甫十歲即斷肉
味不食以終身度其作念雖宗佛家而不泥其說其
宅心要以濟人利物爲主故見橋梁之地即捐貲脩
之而忘其蓄積有無見一果一木之樹可用即爲植
之而忘其植於何所娶李氏生子五曰德曰傑曰章
及君季曰崇延師誨迪誠意懇惻無所不用其心後
皆成立雖不著仕籍而鄉人之論業耕讀尚禮讓者

必歸焉而族姓因大以著君在群從尤敏悟蚤從兄
傑學凡經書過目即能默誦不忘然不務攻舉子業
爲進取資故獨隱居教授以終其身蓋其師承亦自
得於家矣平居溫厚坦夷務崇敦朴雖在家庭亦未
嘗有疾言遽色人無踈戚咸愛而敬之世謂篤厚長
者不誣也配秦氏出同邑名族有賢德克執婦道生
子男二長允懋舉進士授行人次允懋亦讀書能文
女二長適邑人劉壽次適楊萬銀孫男四祚禴禧祉
孫女五長適安岳湯郎中子紹恩育德邑庠次聘同
邑張進士子緒餘尚幼君生正統戊辰十二月一日

以正德甲戌十一月二十六日卒得年六十有八先是君康寧行人君奉使山西晉府取道過家獲觀省焉旣還朝僅浹月君遂屬續人以君獲見其子之成而又見其持節畫錦而歸其平生積善之慶教子之篤可少慰矣行人君聞訃旣復

命遂解官將以卒之明年月日奉柩塋於

之原乃以張進士孺脩所具狀屬余銘於墓銘曰位固不獲兮德則有以裕於身澤雖未洩兮善則有以資於是惟不愧其鄉兮歷百世而名莫能湮

贈監察御史張君暨封太孺人房氏墓誌銘

正德甲戌冬十有二月十九日贈監察御史張君配
封太孺人房氏卒其子監察御史縉居京師越明年
三月訃至哭踊悲號莫及乃詣余泣血請曰縉不孝
禍延於母五內崩裂無可柰何矣惟先君以弘治壬
子奄棄時縉在諸生列故雖塋合江縣成都山之陽
未有誌諸墓石者非敢緩也力弗逮也茲吾母復逝
禮當奉柩以合塋而不朽之圖敢勤於執事覲矜而
留意焉余旣吊不得辭按狀君諱洪字彥寬世爲重
慶巴縣人自上世隸籍戎衛曾祖諱添富以隱德著
稱鄉閭至祖諱仁以屯田在合江徙家焉父諱政先

母程氏君性明敏蚤歲讀書篤志弗懈繼以明醫術
思用其活人之心以跂古良醫乃益肆志精之遂有
聞於時人有病者求診視無寒暑遠邇輒徃多獲救
療未嘗計其報與否也居家雍睦自其父及叔父同
居恩義藹鬱君承之長幼踈賤咸加處分無不得其
心故子姓雖踰千指和氣盎然無後言鄉之耆彥多
愛重因顏其堂曰孝義非誇詡也急於周貧恤匱廩
有宿儲輒思給人其貧不能償者悉取券焚之曰無
俾其心有所繫也時以耕牛貸人亦隨俗令歲輸租
然不問其孽息或至失牧倒死者亦不責其償曰雖

畜類豈無病者乎人以是益懷其德太孺人出色名族父諱永昇母柯氏太孺人慈慧柔順其教於壺以內與君合德凡織紵以助君勤儉無或厭怠饋食以佐君宴享無弗精好施予以佐君賙濟無弗誠懇君既歿而門內之治如一日子男五長紀次綸早卒次縉即御史次綖以義給章服次纁弘治辛酉舉人亦先卒女二各適名族周盛宋鏊其婿也孫男五曰璉蚤卒曰璫曰文治補郡博士弟子貢曰文瑞曰文教孫女三曾孫男三皆尚幼君生正統丁巳卒時享年五十有六太孺人先一歲生享年八十君秉德寬恕

東川集卷之十七
而獨嚴於教子故諸子咸成立雖未及見其子之榮
顯而卒受 贈典太孺人則身獲貤

封之恩榮被閭里隤祥委祉日盛於後信乎爲善無
不報也乃叙而銘之辭曰 世稱活人子孫其興積
善餘慶如影隨形維君令德克紹於先施靡或念困
罔或捐孰疑非壽而名固傳成都鬱鬱萬世之藏孺
人配焉無敢壞傷

劉安人余氏墓誌銘

安人姓余氏重慶璧山人今浙江按察使康村劉公
配也祖諱 仕爲湖廣桃源縣丞父諱韓有隱德鄉

里稱爲長者號曰壁峯處士安人生而端敏簡重爲
父母所鍾愛旣長擇所宜歸適於公始歸內外尊卑
咸謂其能盡婦道公敬焉而得以竭志畢力於舉子
業初公育德邑膠距家幾百里乃假館於其母家安
人重累舅姑則盡脫簪珥置買田僕督耕織以給薪
水及公舉進士歷刑部主事雲南僉事山東副使浙
江按察使安人皆隨侍所至閉門靜處約束童僕絕
通女嫗閨門之治井井有條故公敷歷中外三十年
無少內顧之憂而英聲偉望屹然爲一時藩臬賢臣
安人助於內者多也其尤所頌於人而不易及者則

撫愛庶子逾於已子門內親戚不覺有纖毫薄厚雖
庶子亦但知其爲安人所出而已其在官與人接則
執謙汰侈不異士人私居禦寒止一敝裙補綴餘二
十年不棄其性如此亦非有所矯飾也求之古人所
稱女德安人蓋庶幾焉宜偕老受祉而乃病疽卒時
弘治丁巳二月十九日享年僅五十有二於乎惜哉
男二曰申惇恪能志於學曰川即庶出者亦竒特不
凡女一適張都御史之子均孫男一曰洋公之母於
春先祖母爲同族春因受知得接見安人問起居其
子申將以 年 月 日卜塋 之原請爲

之銘曰 婦人之懿幽靜淑貞易稱恒德詩咏采蘋
有美安人其德克類世之所咻我之所貴象服在躬
巍然如山夫子之道克成於官有子誨之益宏其器
年之不遐惟後之利

封監察御史盧公墓誌銘

於乎自敬宗睦族之典不行而尺布斗粟之謠往往
而是其視從屬若路人者益不異也若

封監察御史盧公者其殆可謂義士矣乎蓋公自曾
祖以來務儉家用饒裕至于公而貲益充成化初乃
有從兄弟者懷覬覦無所售其計則誣訟其產於官

曰某地吾分所有公曰天下難得者兄弟易求者田地也吾忍溺於易求而傷所難得之恩異日何以見祖宗於地下悉推以與之官府重其讓時人義而稱之於乎若公者不可謂義士乎公諱汝恭字伯敬號松坡居士其先楚之孝感人元季徙蜀合州今爲合之鉅族曾祖諱源政祖諱仲誠父諱倫皆以隱德著稱鄉邑母趙氏同羣之女公稟賦清厚性剛明爽閭雖承先世積累而耻不振施嘗曰積而不能散守錢虜耳故凡貧不能昏嫁喪不能具棺槨者恒厚給之無間疎戚會建議許輸粟給章服公曰此亦古

人輸財助邊之意義宜就有子儀課讀書恒飭厲不以愛弛儀果舉進士爲監察御史上藉有聲譽人謂公能教其子也公於子旣貴益守禮執謙爲縉紳推重嘗偕林下耆宿日爲詩酒燕會之樂弘治戊午冬詔覃恩臣寮公得封如式配蔣氏爲孺人童顏鶴髮服膺寵命龍章寶軸賁于丘園公之食報非偶然也越明年十一月初二日卒享年六十有九壽不稱德於乎惜哉男三人長即儀次仁早卒次佶女三人長適同隄士族陳朴餘尚幼孫男三鶚鵠鵬孫女二公卒之明年其子御史君聞訃奔喪將以年 月

日卜塋鳳樓山先塋之次問銘於余余在鄉黨
後知公者也不可辭因首叙其大者而後及其餘銘
曰 有苑其枝同出一根或瓜而爬液漬於痕相彼
何人寇讐弟昆數世而後漠然寡恩自公之讓薄俗
以惇聿有 寵命赫然于門天之報施涇渭異源爲
之在我不朽而存彼不然者孰爲其倫我銘公義用
警其昏

樂山陳處士墓誌銘

鄧都有隱君子曰樂山處士者姓陳諱鐸字鳴振愛
所居北郊別墅有山曰金羊岑律鬱秀日徜徉其間

因以樂山爲號而人亦謂其德似之故皆稱爲樂山而不名云處士性至孝父諱良晟三十有六即棄世母鄧時年僅三十有三抱拮之十八日生處士稍長秀敏不凡爲母所鍾愛擇師教之處士克承母志讀書日見進益繼以志於色養遂棄仕進弗事父之慕爲司馬子長之遊挾貲出瞿塘歷江陵洞庭過武昌遇勝槩輒肆品題詞旨雋永識者歆賞尋舟發九江迅風暴作帆檣幾摧折者再舟人雖怛怵水而蓋股慄鬼喪處士神色不動但且禱且誦曰老親無鶴算遊子必鯨吞有頃風息舟獲無虞人謂孝之所感也

比歸不復出築室城東構樓三楹以奉母扁於楣曰
覽勝每良辰佳節則率妻孥奉觴稱壽極懽而後罷
以爲常母晚遘羸疾起處非人力不能處士恒身親
之未嘗或委於婢僕湯藥必親進衣不解帶者閱數
月旣卒哀毀骨立塋祭一依禮家居手不釋卷每讀
史得古人嘉言善行率手錄口稱以訓迪後進尤不
靳施予凡橋梁道路之廢圯者多捐金脩繕鄉鄰有
急往稱貸者無弗應其有貧不能償則取券焚之配
董氏出邑名族貞懿簡素與處士合德處士意所欲
爲恒能先之梱內事鉅細綜理井井有條至出納錢

穀纖悉不遺忘若籍記然事姑孝愛甚得其懽心處士之所以得竭孝養而成其家者固有助焉處士以永樂癸未九月二十六日生卒于成化丙戌十月二十九日孺人生視處士先一年其卒後九年男三長濟仕至曲靖府通判次淳次治出側室女一適邑人冉悅謙孫男六可言訓謨善誥孫女四曾孫男二處士之先爲楚之孝感人祖諱彭者在元爲鎮撫有事於蜀因家鄆都今遂爲鄆都人彭生仲榮仲榮生處士之父俱有隱德余偕濟領成化癸卯鄉薦悉其家世乃見諉曰吾二親俱於卒之明年合塋金羊山之

原墓石尚未銘蓋有待也子曷容辭乃爲之銘曰
金羊之山氣鬱弗中有異人迥傑出愛山不但空挂
笏安常不動多利物生徃遊之塋於沒樂哉斯丘此
其律世無有害端可必考德吾文非浪述

封戶部主事侯公墓誌銘

弘治戊午冬十有二月

詔兩京臣僚未考滿者皆給與應得
誥勅於是戶部主事侯君啓忠得蒙

恩封父如其官母李氏贈太安人繼母羅氏封安人
蓋異數也越明年封君倏捐館時己未八月二十四

日春秋四十有九始踐榮塗遽闕其年於戲惜哉君諱舜臣字虞佐姓侯氏世家叙州之長寧上世隱德弗耀至君之父諱旺以儒起家爲息縣令威惠並施藉有時譽秩未滿乞致仕母牟氏賢而有內行止生君一人君穎敏敦恪幼習舉子業一志不懈凡爲四書時文及所占詩皆與同志講說分析旨趣多可觀者咸化丁酉就試不偶徃省父母於息當歸念無次侍乃慨然曰爵位之來有命存焉况身外事乎吾安得舍吾父子慈孝之恩而僕僕於不可必得者也遂棄所業依息及其父歸林下則所以竭驥甘澣之

養以致其孝愛之誠者無不至以其餘力究通岐黃之書日課其子啓忠讀書作文恒飭厲之曰吾家世累積德未大發必於子乎取之其子年十八遂登進士躋膺仕故鄉邑之人咸謂君能教其子而君之懷德不顯豈天固鍾美於是嗇而不克並耶君於邑城南二里許創一室環植松竹積古今書千餘卷於中曰今之所以知古者恃此耳飭身治行好惇古道不隨時俗馳逐父母沒殯一以禮不作佛事盖庶幾古所謂鄉之善士者歟元配李氏同邑李永宗女與君合德先卒繼配蔣氏亦卒子男三長即主事君次啓

孝啓庶女七長三人適士族餘尚幼在室主事君聞訃哀毀即日解官將以 年 月 日塋於

之原來問銘余嘗接其祖於息長身玉立義形於色因可以知其子而又獲交於主事君信乎其德宜銘銘曰 固有以穫之亦有以與之其穫也如植其與也如施景命伊始遐不錫期峻秩崇褒尚遲於後食報不愆視德孔富

鄉貢進士戴時章墓誌銘

弘治辛亥秋八月 日余友戴君諱收字時章卒

于京師族邸余偕中翰蔣君肅之吊焉則惟其妻率

幼拊棺而哭其友丁希說爲之經營喪事於乎痛哉
時章以己酉冬挈妻子會試南宮父景瞻及季父景
良皆以太學生謁選銓曹來聚余嘗趨問徃來則見
時章之左右就養者皆得其懽心其與人交一以誠
意其言訥訥然如不出諸口其讀書務精博發爲文
章有根據不爲蕪詞蔓說余切謂時章非世俗士當
即見售售必能以才自表暴於世者也未幾就試不
偶時章了無愠色尋景瞻判陝西之徽州景良知沅
陵相繼之任而時章在太學初不以挫抑少懈其志
寓一室日與名士相淬礪其業孜孜忘晝夜寒暑由

原缺

即諳世務如老成人成化間副使以御史從項都御史忠旣平荆襄流民未得所處公聞而奉書曰宜郡縣其地俾附籍則久之皆土著後患亦彌矣副使公竒之而當事者不能用後竟如其言年二十四以禮經舉鄉試第四人至弘治庚戌舉進士襄垣之有進士河間後惟公繼之尋補高密令越三年課績最徵擢戶部主事已而丁太恭人憂守制服闋改刑部久之擢負外郎至是遘疾竟不起年纔五十有一耳於乎惜哉公氣宇軒豁負才識其爲政務在惠愛初至高密屬連歲大侵民多就食四方逋負累數萬公輕

徃薄賦撫輯其居者而招懷其失業之民遂以次輸完倉庾傾圯公謀改作乃預蓄材而後鳩工不兩月落成不知勞即儲粟三萬石有奇民得不填溝壑者衆歲壬子春旱公禱于五龍祠輒應夏又旱禱亦應公曰役民雖春秋所譏然爲民祈福可也乃爲新其祠邑地故多荒蕪民苦租稅不敢佃公下令俾墾辟而薄其賦民樂占業以是高密人戴之如父母比去任勒其功績于石其在戶部分司臨清倉儲出入宿弊梳剔無遺在刑部平恕不苛凡奏當之成出於公者人無後言其居家尤孝友副使公沒于任公時未

冠而能舉柩歸在道不失禮既塋結茅墓次惟以課耕績學爲事撫愛庶弟鳳鳴甚至恒口授經諄諄不告勗曰吾弟幸成立異日庶可見先人於地下也其居官雖廉而篤於爲義初以家政諉姑子餘二十年求去令恣所欲取之仍分畀以田一區叔母陳早稱未亡人公事之如叔父而爲之立後凡供具歲致不少替內弟卒遺女才十四其母不能守公乃爲治裝如已女嫁之性尤喜吟咏雖在劇曹日課一詩有北村集藏於家配張氏於公協德能助於內封孺人湖廣按察僉事輓之女子男三長即龍次夔育德邑庠

次元幼女二皆適士族李史王寅者其婿也孫男二承爵承祿女二余與編脩同仕獲識公竊謂其名位當顯赫而乃止此豈非命耶是不可無銘遂爲之辭曰 世累傳經逮公丕顯載其令問胡適弗善譬彼檀車檻檻周道孰曰柅之其極弗造弗造其極有命自天維德之懋瓜瓞繇繇斯其永藏弗崩弗騫

翰林編脩簡菴劉君墓誌銘

於乎吾友可大竟止於斯耶成化甲辰春余自成均識可大見其思歸汲汲然詰之曰吾於親未嘗遠違茲強而來無時刻不在念也丙午以外艱讀禮於家

人稱其孝繼弘治庚戌登甲榜

廷試進士第二入翰林爲編脩越三年爲癸丑奏績
最得贈父封母即謀歸省泊祭於墓以時制入仕者
非六年不許則謁告侍養五年母乃以義迫遣之曰
汝荷 朝廷拔用以貤榮於我惡能安於家食不圖
報稱且汝婦衛氏善事我盍留而往不公私兩盡乎
乃強來僅二年衛訃至則泣曰吾所以重違母命恃
有吾妻也吾妻今沒吾曷能留即復謁告歸又七年
乙丑秋會 孝宗升遐遺詔至旣哭臨復除母迫遣
如前加嚴且曰汝妾婦事我如衛婦爾男謨亦長可

留侍爾第往乃獨挈其一子來來踰半歲而遘疾不
浹月而屬續矣時丙寅七月五日也於乎惜哉先是
五月之初予偕可大以孝宗小祥恭祀於陵笑語
顏貌無疾之形也踰月不見人傳在告未之信旣信
而往問云已瘳又一日不起其疾將革即自畧爲狀
屬其友增城湛吉士元明叙次而命其從弟存禮以
屬銘於余於乎余何忍銘而亦何忍違吾友之意耶
君姓劉氏諱存業字可大別號簡菴其先金陵人自
始祖諱必振者爲廣東鹺場大使即家於東苑今爲
鉅族由必振而五世至源咸以德善著稱源生諱潤

者爲君之父尤信義剛直母李氏出圓沙之黃黃故名族李從諸舅得聞詩禮格言故君在襁褓時恒口授之及語以古賢哲忠孝之事君聰明因日開稍長其父復教之嚴故益肆力於學遂領成化癸卯鄉薦第二有司刻其文爲程式比爲編脩克脩其職踰十七年丙寅乃再趨闕之時會

皇上開經筵君簡充展書官被

賜白金楮幣詔開史局纂脩

孝廟實錄君爲纂脩官蓋同年而升者數歷中外漸貴顯矣而君以親故止此其於親亦可謂無嫌於心

而垂絕戚戚惟以貽母之憂不獲終養爲言可哀也已君白面豐順眉目踈秀美髭髯見之者皆知爲貴人襟度軒豁與人交無城府而其自律凜凜不忒家居未嘗事造請草洲魚鹽之滯獄或以獻於君君峻拒之曰吾豈可以是殖禍於後也其爲詩與文不務刻削殊有思致識者謂類其爲人男五長洪宇先卒次謨皆衛孺人出次諮次諫次詔及女二側室徐氏出女幼在室君卒春秋四十有七一子在側僅七歲經理其棺歛皆其鄉友及門人編脩襄垣劉舜卿葬在 之原與衛孺人合亦治命也銘曰

原缺

又樂親之不見踈薄今多育德郡膠子三人皆教以
業儒長曰仁補郡博士弟子負學成而卒次曰詳次
曰邦舉進士爲翰林庶吉士吉士未第居京師公嘗
誨以書曰毋怠爾學而諉得失於造物薪水之給吾
能助之及旣第復致書曰爾得遂所志可喜然尚有
大者可勉企湏務甘淡泊也配魏氏出郡之鉅族歸
公克以禮助於內每用度皆有經費至於教子則未
嘗節量恒脫簪珥不靳成化辛丑正月十二日卒享
年三十有六塋於紙房溪先塋側繼配莊氏亦合德
於公翼愛仁輩不異已生女一適士族孫男九汝翼

汝爲汝職汝明汝事汝功汝聽汝德孫女二長聘余
弟文選子嘉年次尚幼公卒於正德丙寅六月七日
享年六十訃至吉士君解官奔歸將以 年 月

日從其兄扶柩啓其母之窆合塋問銘於余余
比省覲屢接公言笑嘻嘻體貌豐厚而飲啖如少壯
竊謂公厚德固宜有子如吉士福履未艾也乃遽至
此遂叙而銘之銘曰

古之處士隨寓而安居儉履約心每怡然保其天和
乘方不忒如得其道坦焉不惑有美如公豈不似之
承其世德蓄而不施亦旣啓之方隆厥始火然泉達

其孰能止考德於後允在於斯永

錫厥命其利固宜

東川劉文簡公集卷之十七終